



Хорам, тащаң, лащкам мувева сот педа вет тал

Кат щёрас хольмаң педа вет-мет тадан ван хатлап тылашан яңмет хатадан Ямало-Ненецкой автономной округ сот педа ветмет талад постаты питал. Щи хув нупат сус, регионэван вошат энапсат, хоятат улапса яммас. Улты мувеван хорамаңа, лащкама, тащаңа йиты ураңан, муй иса верда.

Хащам ятатан муң мувеван няврэмат артан сема питты питсат, хон мувев кутлап показатель идташак хащас. Ар няврэмаң хоттэлат ураңан ар нётоп округ хуват верда. Щи онтасан, лув субсидияйт, хот омасты мув, хот лутты ох шитлат, ёша паятлат.

Ямал мув вошатан ар ялап хот омасса. Хоятат лыйм юх хотлаң элты ялап кев хотата касаллат. Тунял яртыяң щё-рас модтас хоят катра хотлаң модсатсат, сот педа хулам ар хотъятаң ялап хот омасса, щита 3 992 хоттэл улты питас, щи тумпийн 740 атэл улты хот верса, ялпа омасса.

Леккар хотатан ар ошаң па нопсаң леккар рупитал. Кашаң хоятат яммалты, мушат артадаты кеша ар ялап йис мутра туса. Округ суңатан

рупитты хоятат лечитты кеша, тохлаңхопатаң, донцхопатаң фельдшер леккарат яңхлат.

Улты мувев ищи яма шави-ман тайла. Округан ветхощъяң такан шавиты мув суң ул. Катан – федеральной значение тайлаңан, хуламхощъяң – региональной. Щита улты войт, хулат кетамты ант рахал. Во-шхулэт, вош леп харат сыстап-ты волонтерской проект «Эко-логия внутри» хоша кашң пуш ар хоят пилташийл.

Тата улты мохет кентат яңхты ураңан, кашң тал катра юшат яммалдайт, ялап отат пондайт. Тал юшат ищи муйкем турам мал донц элты сыстапдайт. Каргы юш хуват яңхты верат ищи ялпитлайт. Новый Урен-гой па Лапатнаңк вошңанан вокзалңан яммалсайңан, Пурпе вошан ялап вокзал омасла.

Там тадан Ямал муван ищиты юбилейной таллаң районат па ун вошат постасат. Щи емаң хатлатан ЯНАО мув суңатан ар каш хар дарпитыса, щи тумпийн, регионэв йис верат хоятатан нумты кеша, ар айкел, ван-топса, мастер-класс верса. Округ ураңан ар верам хоятат тынаң мойлапсаятан юкантсайт.

Пулцават вош опсантам пора



Хор: Сергей Зубков

элты 430 тал хащас, Новый Уренгой па Ноябрьск 50 тада йисңан. Ямальской па Лорвош районңан округев арат тал сайн тыйсаңан. Кев леп па Тазовской мувңан емаң хатадлын щахашак постадңан – олаң районал 95

тада йил, киметал – 85 тада. Унт дор тылашан Лапатнаңк ветъяң талад постас. Мосал нумалматы, щи мув лотан хоятат 157 тал сайн улты питсат. Хантэт мет олаңан.

Там ешак тынаң мувеван шоши хоятат йис порайн тыйидыйм верат ант ат ёрэмалат, там улапсаел щуняңа, тумтака манал, хоттэлат энамлат, вошат холна хорамашак йидат! Вулэң тащлув ат энамлат, ёханлув камн сыр хулан хуңхлайт!

Валентина Рохтымова
ханшам потар

Нэман верам мойлапса сытам нэңхэт

Нэман верам окружной П.Е. Салтыков, Л.В. Лапцуй, С.И. Ириков нэмпии касты хара, мойлапса сытам нэңхэт нэ-мат лырамсайт. Тампус щита холамхощъяң ропата китса: вет ор ясаңна, хут – ханты, кат – ёрн ёх. Мет ям ропатайт пирьгты ораңна комиссия актыдыса, щита журналистат, хыщам талатна нох питам, потрат хансты па толмащты нэңхэт лоңсат.

Щи арат нэңху эвалт 2025-мет тал лауреата холам нэңху пирьса. Анна Яптик Пулцавт, Оксана Лонгторгова Приуральской район па Татьяна Куболева Крас-

носелькупской район эвалт. Касң нох питам нэңху ветъяң щёрасна майлаптада. Касты хара китам ропатайлаң «Хаттэл», «Рут ясаң» па «Ямал – ма хатам» тема тайсат.

Анна Яптик китам ропата нэмад ханты ясаң педа толмащ-та ки «Тащаң ор ясаң энамты нэңхэт элты мата». Потрална Ле-онид Салиндер пушци Гыда по-хал эвалт хансал, лув ашколайна няврэмат ор ясаң педа онттал. Хантылу эвалт Оксана Лонгор-това Приуральской район эвалт нох питас. Ропатайл нэм «Хан-ты ясаң маньщат» – «Сказки северной земли» луңатты нэпек,

лув нил ясаң педа толмащман ол: ханты (Кев сыд ясаң), руш, английской па немщат. Ёрн ёх кутна Татьяна Куболева, ропатайл нэм «Эттыла Артика-ны» – «Путешествие в Аркти-ку». Щита лув хансалады, хоты Толька похална мет ай нявре-миет ораңна «Селькупский для малышей» программа верас.

Щимащ премия Ямал мувна 2012-мет тал эвалт мада. Щи арат тал сус мули 42 ор, хан-ты па ёрн ёх ясаң хасты нэңху мойлапса сытсат.

Вера Лонгторгова
хансам потар



Хор: ЯНАО КМНС департамент

Мойң хоятат Ямал муван лавадлайт

Москва вошан Ас потты тыдась хольмаңмет хатадан ГУМ хося конькийн хатэмиты хар пуншса. Округеван туризм сирн рупитты хоятат Кремль хар хося вуды хот донсыат. Сита Ямал мув улапса эталтыса, BOSKO фирма ёнтты думатты сохаң коллекция эталтыса.

Худам хатл сыс округев элты яңхам хоятат сита рупитсат. Мойң хоятат вуды хота доңемисат, «Примерь Ямал» акцияйн па Bosko Expedition Ямал коллекцияйн пилтасьсат, ям эпдаң Овс мув лэтотлудв умасьдысат.

Ас потты тыдась хольмаңмет хатл элты курк тыдась хольмаң педа нийлмет хатл унты, акция манти сыс, хой BoskoBosko лапкайн ярсот педа яртъяң сёрс солкува элты аршак думатты сох лутал, Ямал мува Вуды ёх



Хор: Роза Накова

емаң хатла кат билет шитты верытал.

Вуды хот мохты сәма хойс, хоятат тохи доңемисат. Лув кутэдан хон мув арыты па кинайн эталтыты ёх усат: Милош Бикович, Филипп Киркоров, Дмитрий Маликов, Александр Стриженов хоттэдан, Аркадий

Укупник, Лариса Рубальская па отат.

Си уйтантопса манам тахайн ханты хоятнан – Егор Егорович па Роза Тимофеевна Накончан усан. Лын кашң порайн симась тахаята яңхилыднан. Тампуш сита вуды хот донсылыснан, шоши мир улапсаев эталтыснан.

Роза Тимофеевна си уйтантопса элты каматса ясаң ястас: «Округеван Кеван кеввурат элты хатэмиты комплекс омасты питла. Сит элты потар тусув, Ямал мувев эталтысув, шоши мир ёх улапса альсув, Bosko Expedition Ямал коллекцияйн пилтасьсув.

Эталтыйм сохан ханты ханшет альман улдат. Си фирма куся ху Михаил Куснирович, хун округева ёхтыдыйс, шоши мир ёх тайты сохлуд шеңк самада хойсат. Сишан эталтыты милатан, ернасатан, хоптанатан ханшилудв ёнтман, ханшман улдат.

Ялап талан си рупатаев елды тулэв, хон мувев па па муват элты Ямал мувев вантты па сютситы аршак хоят ат ёхтыдыйл».

Альбина Тырлина ханшам потар

Дупан довалты касапсайт мантсат

Округев хуват дупан довалты ашкуда Горка вошан пуншман ул. Симась касты харат ай куртатан пуншты утсилайт. Горка вошан симась ашкуда 2023-мет талдан рупитты питас. Си тал элты касапсайт вердайт.

Там мосванан хон мувеван дупан довалты касапсая Горка вош ветхосьяң няврэм пилтасийс. Си касапса онлайн сирн манас. Сита Горка вош эви Юлиана Русмиленко, 414 лув довалат няврэм кутан, хольмаң педа ветмет тахая этас. Кат няврэм сотмет места нумпия этсаңан, па мохет катсотмета питама хоят элты ёхи ант хасьсат. Щит шеңк ям.

Куртаң няврэмат дохан хатэмиты уталтаты па дупан довалты ашкудайн рупитты ху Илья Игоревич Русмиленко ясаң верас: «Муң г р е б л я -

индор хон мув ашкудайт кутан манти проекта няврэмат пилан пилтасьсув. Тампуш щёхар тыдасян хон мув ашкудаятан дупан довалты лига пуншман ус. Тохи ашкудайт кутан онлайн касапсайт доңалман улдат. Муң ашкудаев си па питас. Ашкуда па классат кутан няврэмат юрдал альсат. Командной касапсая хоят ант тармас, тохи хольмаң хоят мосал.

Елды ятата командной па лув ёра касапсаята няврэмат лэсаятлудв. Хут хоят йи минута сыс довалты питад. Тампуш мет ар – 2 206 няврэм хон мувев нийлъяң педа нял уталтыты таха элты касапсая пилтасийс. Сит хутмет-ихосьяңмет класс доват похат па эвет, одаңмет па кимет курсатан уталтыты энамты ёх.

Тови унты няврэмат холна худам пуш каслат. Тренажёран, экран хуват виртуальной хопан довалман, хон мув касапсаятан лувилат эталтадат. Ун кер тыдасян хасям ята хон мув элты мет юраң, каркам хольмаң няврэм пирыда. Муй воша касты мандат, ясаң верда».

Округеван дупан довалты, байдарка па каное округ федерация Пулцават вошан пуншман ул. Горка вошан дупан довалты ашкуда рупитал. Симась касты верат «Развитие физической культуры и спорта» хон мув программаята доңалман улдат.

Елды педа, Горка вош няврэмат касапсаятан одаң тахаятата ат этдыдат, хон мувеван округев нох ат паятлэд.

Альбина Тырлина ханшам потар

**ПРЯМАЯ
ЛИНИЯ**
С ДМИТРИЕМ
АРТЮХОВЫМ
**7 ДЕКАБРЯ
18:00**

Шеңк мосты вер

Там лапатан округ губернатор Дмитрий Артюхов нийлмет пуш арадал мир прямой линия щиран акатлалды. Тал соханты пресс-конференция пилан ияха олтман улты питад.

Хоты муң уйтлэв, потар арадал улапса элты манти питад. Муй ям верат тал сыс тыйсат, муй верат па туңматты мослат. Куцаев тунял 40 иншасапса хуват ясаң тус: катра хотат элты каслаптаты вер, СВО хоца улты хоятата нётоп верты элты, па айдат хоттэлат хотан па охан нётты вер элты. Там хатлатан нын хонна верытлаты соцсетят хуват ясаң китты. Телеканал «Ямал» хуват ванталан, мосты верат оша поналан.



Хор: Илья Русмиленко



Овс мув ар нявремаң хаттэлат майлаптасайт

Хор: ЯНАО губернатор пресс-служба



Пулдавна амэт Хатл едпийн Ямал мув губернатор Дмитрий Артюхов Овс мув ар нявремаң нэңхэт майлаптас. Аратэдна хут хаттэл Пулцавт, Ёрвош па Приуральской район эвалт яха актыдысайт. Ямальной филармонияйн уйтантысат.

«Родительская слава» орден мевал посна Мария па Виктор Белецан Пулцавт эвалт майлаптасайңан. Ёын нил эви па хут йик энмалдаңан. Ащел – Виктор, ашколайна онттыйм талдал эвалт юх эвалт эватты вер самална тайс. Щитна тамхатл арпелак пормасат хатл дыпина лув яслална верас, енттытат тэлна.

«Муң ищки Овс мувна оллу, мет хасам таха муң хоцев – щит олты хату, мет хасам нэңху па щита – амы. Муң сэңк ярашду Ямал мув хаттэдатна. Нявремат энмалта – сэңк щёкат ропата, лув государство ораңна

алаң тахайна ол, муң вериттэв кемна, щи ропата верта нятта пилду. Муң регионуна ар нявремаң хаттэл ар, камантсы щимащ хаттэл тамхатл муң майлаптаду. Ёув педылал вантман, алцищ манта лытла. Касң хатна, щи лампа номсаң нявремат энмалдайт, лув рот щирдал-

пищдал савиман тайта онталайт, вулды ювам йикдал па мувел савилат. Амэт сэмна вантты порайна па муң щимащ ёр вантлу – Ямал мув ёрры йитал хорпи», – ЯНАО губернатор Дмитрий Артюхов лавас.

Кат хаттэл «Родительская слава» орден мевал посна

майлаптасайңан. Наталья па Александр Горшковцаң Ёрвош район эвалт. Кат эви па кат йик энмалтсаңан. Нявремдан ханты олапсы, щирдал-пищдал савиман тайдалдал, ханты ясёл ант ярэмадэл. Кимет семья Ольга па Владимир Хоротэтто Пулцавт эвалт. Нил няврем энмалдаңан. Ёув хаттэлэл ал ант оллат. СВО хоца лялесты нэңхэт элты нятлат. Ольга «28 петель» группа хоца яңхал, щита лув ведащ сэмна пита́м нявремат ораңна мил па носки сөвдат. Нявремдал пилна экологической акция пилтащилат.

Холам амы «Материнская слава Ямала» медаль мевал посна майласайт. Ёув кутладна Людмила Корольова Пулцавт, Матрёна Лаптантер Приуральской район па Ольга Петрова Пулцавт эвалт.

Вера Лонгортова
хансам потар



ОБЪЯВЛЕНИЕ

**ДЕНЬГИ БОЛЬШЕ
НЕ ТВОЯ ПРОБЛЕМА**

5 300 000

РУБЛЕЙ В ГОД

2 600 000

РУБЛЕЙ ЕДИНОВРЕМЕННО

**ПРИ ЗАКЛЮЧЕНИИ
КОНТРАКТА
НА ЯМАЛЕ**



Там QR-код хуват доңаты па вантаты, муйсыр нётопсайт СВО хоца улты мохета мадайт. Щи тумпийн нэңдала, няврэмдала, аңкидала па ащилала ищи нётопса вуты рахал.

**Айкед соращак
мощатты ураңан**



Хон рут эви

Парасковья Ивановна Возелова – хон рут эви. Лув ёлта хот пелак опрашад Туляхова. Рат хар хоятлад Поращ куртан усат. Аңкелан-ащелан Паращ нәмна маса, хантэт кутан щиты щи айлда. Ин, ванта, там йисан энамты хоятат волаң ханты нәм ант тайлат, щикүш нәмал анта ханты нәм, щи пора хантэт нәмдал ханты щира толмашсалдал.

Хон рут эви там пуш ярсот педан нийл (88-мет) тала йис. Улмад хуват тащ хотан ийикел пидан Горковской нәмпи со-вхозан яңхсаңан. Няврэмдал иса вутан сәма питсат. Рупатайл хуват ар мойлапса нәпекан мойдыса, медалят па орденат тайл. Лув Ун Ляль пора хоят. Щи шукащ пора аңкидал-ащидал элты хуллийс: худ-вой велсат, ям талдысат, худ солдысат па сорадсат. Дын щи шук пора эвалт шеңк потарты ант дытсаңан. Парасковья Ивановна (Паращ) похдал иса армияя яңхсат. Мет ун похал Германия муван кат тал ус. Лув щи молты пора Кевн яңхас. Ун похал нык хашмал юпийн Паращ ийикел пидан шеңк самдан хошисаңан, дын веран, улапсайн елды нәмолты няврэман ант туса. Каслапса вер щит лаварт улапса, щита туп таксар хоят улты верытал. Ин там унты вутан яңхты улапсайд номасан шавилды: онас юшдал, хотвод лотдал, тольпайдал. Лув ивеван телевизор хуват ханты хоятат улапса элты вантты па худантты дытда.

Парасковья Возелова сәма питам куртыел, щит Поращ курт. Поращ курт пал саңхаман омасал. Луңан кашщ хатл тыел-тохел паршаң хопат яңхдат. Ханты рутат молты кем иса куртдал щимащ лотан улдат, иса йиңк сыдан, унт сыдан. Молты порайн там куртан улапса ал курыйс. Щи куртан энмас па сәма питас хон рут эви. Аңкелан-ащелан Паращ нәмпи нәман понтса. Ай пора эвалт тащ хотан энмас. Ащел Иван Кириллович па аңкел Анна Ивановна

унтан яңхсаңан па щи юпийн Поращ куртан улты питсаңан. Щита дын худ велман усан, щита паварт хот омассаңан, луңан па урхот донщидысаңан.

Поращ куртан щита Туляхов рут хоятат усат. Ин туп тал курт лотал хашас. Йи хотые антам, йи юх па ант шиядалан, луңан тал пал торан энмал. Ху-ваншак курт иса тутан ёсса. Ин там унты Паращ щиты такан



Парасковья Ивановна Возелова (Туляхова)



самал яха щамарда па сәм йиңкал этал хун энмам куртада яңхидыйл. Ин туп щита луңан пал торан энмал, талдан па нави донщ одал, нәмолты хоят тур сый щита ант щашал...

Любовь Возелова ханшам потар



Кев сыл район этам вер



Щёхар тылащ ёңмет хатлна 1930-мет тална ВЦИК партам щирна, ван хатлап тылащ ёңмет хатлна Обдорской район эвалт холна йи йит этас – Приуральской район. Там лопасна муң лавадэв хоты щита мет алаң леккар хатат этсат. Йи олман ай похлат пунста питсайт.

Приуральской район мет алаң леккар хатат

Мет алаңна Приуральской районна мет волаң похлэд Щучье ос, щита 1930-мет тална мет алаң леккар хат пунсатас. Щита иволап хут мосаң нэңху понта веритса, лувилал лечитман холам нэңху ропытас: леккар, ай леккар па санитар.

Холам тал манмал итна, 1933-мет тална, Охсар похална вулсак леккар хат пунсса, щита хольмаң хойты таха аматса, щита онтасна мет ар нэңху лечитта веритса. Щиты олман касң ай похална ай леккар хатат (медпункт) пунста питсайт.

Нэңхэт номасна мет такан Волаң Ляль пора талат хыщсат. Щи порайна, ляльна ант питам леккарат, ропытты талдал сэңк щэктат мантсат. Нэңхэт камн сот эпидемия эвалт ямалтсат.

Приуральской нэңхэтна леккар ими Марта Петровна Неделько номла. Лув дыдал ант щалитман, тиф мос этмал порайна нэңхэт лечитман, антамм ювмал. Тамхатл, Охсар похал поликлиника хат путар хоца лув нэмал «Доска почёта» хоца хансман ол.

Щиты олман, 1969-мет тална – Охсар похал леккар хат кутап леккар хат нэмна маса, ай похлат эвалт нэңхэт щита китта питсайт.

Харсойм – Ас сылна лайты хорам ай похал

Йис потар ол, хоты лув этас. Йи хат пуңална кат соймийи

осңан, ихощаңна нёхамсаңан. Кутданна лохсаңа осңан, топ Ас хоца питта питманна, щита лампа хорам-ёхан ораңна кутданна яха лятатмасңан па мет пал хар вурам кат таха педа нёхамсаңан. Щи мет пал хар вурамна нэңхэт олта питсат. Хорам па тащан таха пирысат: тутуку па рэх ар. Нык охалла ки, йис потар этам па похал элты мийм нэм – кат сойм нёхамлаңан. Щи йис потар эвалт там омащ похал ханты нэмал манас.

Волаң Ляль етсамал юпина, щита худ велты колхоз пунсса, щита пора эвалт Харсойм энамта питас. Нэңхэт ай худ велты панат Вылпосл, Халасьпугор, Каменка па карра Харсойм эвалт щита касадта питсат. 1961-мет тална рыбоучасток этас.

Мет алаң ашкода 1943-мет тална пунсса, худ велты ях нявремдал щита онттыда яңхсат. 1973-мет тална округ хуват мет алаң ашкода-интернат ропытта питас.

Тамхатл Харсойм олапсы педа вантман ки – ищиты кат сойм нёхамлаңан, ищиты мет пал вурам элты нэңхэт олапсэл



алңищ тулэл. Хорам ор, хата тутуку па рэх ар, мур щирдал-пищдал савиман олат.

Ханты нэм тайты похлыи

Катравож – ханты ясаң эвалт толмашман «катра вош», йис похал. Катра тэлна щита муватна хантэт олат – худ па вай велты ях, похал щита версат.

Щи тахайна, Собской перевал эвалт, мет кат хорам Кев ёхан – Собь па Макарузь пинтшалңан. Йис пора эвалт щита санно-тракторной ёс Рай-Из Кев эвалт маньдымал. Щи юпина вул ханат тынэсты ёссы верыдымел. Щийщ Ёмвош па Топодвош эвалт камн сот пормас тыныта тувам, Катравож эвалт па – нави худ, вай сохат, кадаң нёха, рэх, нахар ханат ораңна пидатмел.

Йилап административной этап щита 1932-мет тал эвалт пинтшас, щита порайна Собской утхат пунсса, 1976-мет тална па Катравожской утхатты нэматса.



Нави похал

Мет алаң хаттэлал Седельниково похал эвалт 1951-мет тална Щучье ёхан сыл олта пирысат. Мет найң хатлна ёхан эвалт щита хар педа вантла ки, век нави олтал, щита онтасна, похал нэмал этас – Белоярск. Сталин нэмпи кутап колхоз щита касадмал юпина, щита мувна йилап ув пунсатас.

Похал ораңна ям хатлат ай тахайт потты тылащ 1-мет хатлат 1961-мет тална пинтшасат, хонты район карта хоца «Байдарацкой» совхоз этас. Белоярск щита ораңна кутап усадьбана пирыса, щита онтасна лув Приуральской район мет вул сельскохозяйственной центра йис. Щита худ па нёха лэщатты цех пунсса па вай сох лэщатты мастерской, округ ловатна йи щимащ цех антам ос.

Мет алаң ай паярт хатат эвалт вул кев хатат маса энмас – щимащ ёс Белоярск похал манас. Щикем ищки мувна олман, нэңхэт щирдал-пищдал савиман олат.

Вера Лонгторгова хансам потар




Хор. priuralysk.yanao.ru



Ямал – муң улты музев

Там лопсэв няврэмат кеша дэсятсэв, округ емаң хатла постасэв. Улты музев элты потрэв тулэв. Муй тахайн Ямал музев ул, муй хорпи шоши мир хоятат тата уллат, муй верлат.

Муй хорпи округев герб, вотвой тайл, Овс музев элты муй уятлаты, муй хорпи войт элты амаматсет уллат, дэраплув.



Муй хорпи Овс музев

Овс музеван лапат район па нийл ун вош ул. Кашң симась таха лув вотвойт па герб тайл. Йис пора элты тата шоши мир хоятат уллат: хантэт, урат, саранат па ёрн ёх. Вулэт шавилат, хул, вой велпасдылат.

Округ картайн водаң вошат уйтаты, нын улты районан, куртан па ёханан постаты.

Карта пед аңкарматы, Овс музев нын уйтаты. Тата улты хотэв ул, Овс муван улдув муң.

Хуцд вотвой иты ёнтал, Хатл ёшал нохды манал. Си пора ун вошев элты, Гимн сыйт сясъсат ты.



Хор: Альбина Тырлина

Муй округев элты уятлаты

1. Муй областя округев доңадман ул?
(Тюменской)
2. Муй округ вотвой па герб хося эталдыман ул?
(«Вулы оңат» каңши)
3. Хоты «Ямал» ханты ясаңан ястаты?
(Муравленковский)
4. Хоты округ кусяев нэмал па опрась нэмал?
(Дмитрий Артюхов)
5. Муй талдан улты музев тыйс?
(Ван хатлап тылач янмет 1933-мет талдан)
6. 1933-мет тал елпийн Пулңават вош муй нэм тайс?
(Обдорск)
7. Муй хорпи шоши мир хоятат Ямал муван уллат, муй верлат?
(Хантэт, урат, ёрн ёх па саранат, хул, вой велман, вулы шавилан уллат)



Хор: stih.ru

8. Муй хорпи ун ёханат улты музеван овлат?
(Ас, Таз, Пур, Нарым, Собь, Шульце, Мессояха)
9. Муй хорпи ун вошат округеван уллат па муй нэмат тайлат?
(Новый Уренгой, Муравленко, Тарко-Сале, Нарым, Кинской, Тарко-Сале, Нарым)

Осьхуль амаматсет

1. Муй сиськи хоратал?
(Пойтэ)
2. Хойтат кат пуш сэма питыдылат па йи пуш антома йилат?
(Сискей)
3. Муй хул тыхал верал?
(Пенкан селкя)
4. Педңа пецк тайл, антом?
(Тайл, холыман пецк кат)
5. Хой паддал куран уллат?
(Пом ларты вой)
6. Хой тал шуп дэлды ул?
(Мойпар, йинпан вой)
7. Хой куран йиңк йинсая?
(Наварне)

Кимет шупал уйтадан

Муй хорпи верат Овс музев элты уятлаты, дэраплув. Нынапа па, ясңат яха олты мосал, йи потар шупа акатты.

Олаң шупал:

1. Вой ал шукаты –
2. Ющ пормасат мува ал донся –
3. Хот хося ки ликаң амш ул –
4. Ар толах –
5. Кутар ки етан донся ханемийл –
6. Талдан хус тураман шимал –
7. Тадал хошам –



Хор: Альбина Тырлина

Кимет шупал:

ар лаңки питал.
иськия йил.
иськи луң.
наңена шук тул.
луведа каша.

товийн хошам хатлат питлат.
кусайл па ликаң.



Меңк ики мойлапса



Йис порайн и ай ханты куртан унт пуңадн шацци ими хилэл пилн удлаңан. Шацел молты пут каварты па ёш рупата верты сысан хилэда камн щир йис потрат ястыдыйл муй монцат монцидыйл.

Имолты хатадн шацел ими хилэда люм юх элты юхал ментас па нёлат лэщатас. Щи вуш элты хилэл талаң хатл сыс, нёлат поса эсалман, каман ёнтыдыты питщал.

Щиты ёнтман, лув лаңки моштад. Па ин войие нёлан юватлады па ант хойл. Щиканща лаңкел юпийн нюхдасман, хотал элты хува хонтад па ёхды манты юшал хол ушталды. Тыед аңкармийл: вутаң па караң нохар юхат энамлат, тохел вантыдыйл: ващ па хув унш юхат дойдат.

Ин похлэңки лаңки юпийн нюхдасты вер воцкад па ёхды манты юшал канштыя питщал. Щиты хув кут шушал, ван кут шушал па молты поньхематы па эңалты сый худмал. Щи сый хоща айлта вана щи маныйыл.

Тохи ванаматадн, шаңкап ун кал лота этмал. Кал лот йиран меңк ики щикунш вуратыйл па ищипа нох ант питл. Щиканща кал йиңк елды лясемалды па сэман моштам ханты няврэм педа такан-такан щиты увадтал: «Хилые, хилые, яңхилыя-сары, хухалмия-сары там нохар унтаң вур тум пелка, щита ма хотэм ул! Яста имен-имия, хоты ма яни-сорыя лоңksam. Лув сора-сора тый ат йил па манэм нох ат талдады!»

Я щи, ин ими хилы щи нёхдас, щи манас. Хув хухдас, ван хухдас па ешаул наңк юх элты верам паварт хота щи ёхтас. Ёхи лоңемас: ин меңк ими шиңашъюх элты ал опсыдыйл, ёшңаладн норы сэвал



муйладн энамты юхат нох сухталды па кала юватлады.

Щи юх вошайта катдасман, меңк ики айлта нох щи кал лот элты вуратл. Щалта паркатыйл муй нох муңхисыйл па ханты похие педа щиты ястал: «Я, хилые, наң ин ел ал хонта, юва-юва муң пилэван!»

Ин меңкатн, ванта, лув хотэда мойлатыя щи вохда.

Тохи ёхатэлдн, меңк ики ермак ернасл алэмадды па йи пелак лыт овд кешийн хол эватмалды па туп щиты ястал: «Та, хилые, вуйи ма мойлапсаем!»

Ими хилы мойдам ернасл лыт ияха ёвармасды, лаңкра понтсалды па щи кеман ёхи шушмас.

Юхат щи ернасл лыт элты шацел имийн талаң лапат ернасл ёнтыдыса.


Щи щунялн-холодн хилы шацел ими пилн ин тамхатл унты удлаңан па меңк ики элты туп арсыр ям номпсат тайлаңан.

Владимир Енов
ханпсалды

па, курада онтап кел ёвартман, няврэм тяттидыйл. Ханты похие шияламал кутн туп ал хещамтыйс: ин похлэңки щи нярэмада, там нярэмада.

Щиканща ин ими хилы, па-тамаман, щиты лувела ястас: «Наң, имем-ими, сора ула, сора ула! Акем ики ун кал лот хоща яни-сорыя лоңмал!»

Ин ими щи килапл, щи манал. Ун нохар юх менэмал, кал лота воцкалды. Унш юх менэмалды па кала воцкалды. Ин лэрдал



Улапсаел кентат, тащаңа, нуптаңа ат манал

Ямал мув тампуш сот педа вет тада ши йил. Тыйм порайл элты, кашң тал сыс хоятат улапса яммалты ураңан ар верда. Округеван худ велпаслаты ёха па вуды шавиты мохета нётты вер мет та- кан тайда. Ванты, там муван йис пора элты тувам верат иса ат нумдайт па елды тулайт.

Хащам ятатан вулэң ёх рупатаел кена- шак верты кеша, мосты пормасат маты питсайт. Шоши мир улапсайн улты мохет хот донщты улатан, нови тут маты мутраятан, портунаң хоша- патан, юх эватты картыйн, холпатаң, хот лаңкты, мо- сты пормас ёнтты, нуйн, парщинан мадайт. Антиды- ациды энамты хоятат, касадман улты ураңан, ши- мащ пормасатан мохты мадайт. Там йисан, куш муй мув суңан ху вулэл пилан яңхал, айкел верты спутниковой телефон тайл, елпи туп рация хуват потарты рахас. Катра ра- ция даварт шуп, хот элты хува ант алдэн.

Овс мув шимлаң мир энамты мохилув уталтыты кеша охан иса нётлайт. Яма уталтыты ураңан, сертификат, субси- дияйт, стипендияйт шитлат. Касдыты ай няврэмат ураңан кочевой ашкудайт, детской са- дикат рупитлат.

Нюрам муватан улты хоятат ураңан ай куртат – факторияйт

омаслайт. Щита касдыман улты ёх кеша верам лапкайт, пормас шавиты тахайт уллат. Щита ёхтыдыты мохет нянь вулат, щутщадат, донщхоплад лэщатлалад, тутыйиңкан пондалад. Щи тумпийн щита ёшан верам пормаслад тыныты рахал.

Хащам талатан артан па муват элты ёхтыдыты хоятат шоши улапса вантты хушты питсайт. Щи веран касдыман па худ велман улапса туты па этадтыты хоятата ям ох нётоп.

Щиты шоши хоятлув йис улап- саел елды туты



Хор: Альбина Тырлина



Хор: Альбина Тырлина



Хор: Вера Лонгоргова



Хор: Ирина Русмиленко



Хор: mk-yamal.ru



Хор: Вера Лонгоргова



Хор: Валентина Рохтымова

нётлайт, щит шеңк ям. Елды там Овс мувеван улты хоятлув улапсаел яма, кентат, тащаңа па нуптаңа ат манал! Шоши мирэв йис улапсаел, рутэл- сырэл щират-пищат ант ат ёрэмалдал!

Валентина Рохтымова
ханшам потар

<p>Газета «ЛУХ АВТ» Адрес редакции: 629003, ЯНАО, г.Салехард, мкр. Богдана Кнунянца, д. 1, каб. 106 +7 (34922) 4-68-63 Е-mail: luh.avt@yamal-media.ru</p>	<p>Учредитель Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708)</p> <p>Газета зарегистрирована Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года Регистрационный ПИ № ТУ72-00558</p>	<p>Тираж 1300 Заказ 1747 Подписные индексы: на год – ПА700, на полугодие – ПР561</p> <p>№ 49 (1300) Газета вышла в свет 6 декабря 2025г. Подписано в печать 4 декабря 2025г. по графику: 16.00 фактически: 16.00 Газета выходит по субботам</p> <p>Цена годовой подписки 88 руб., в розницу не распространяется</p>	<p>Издатель Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708)</p> <p>Отпечатано в АНО «Ямал-Медиа» Юридический адрес: 629003, Ямало- Ненецкий автономный округ, г. Салехард, мкр. Богдана Кнунянца, д. 1, каб. 106 Фактический адрес: 629007, Ямало- Ненецкий автономный округ, г. Салехард, ул. Чубынина, д. 39А</p>	<p>Генеральный директор АНО «Ямал-Медиа» Зулинова Марья Андреевна</p> <p>Главный редактор Яковлева Аллина Кирилловна</p>
---	--	--	---	--